

CONCLUSIÓN do equipo
autor deste informe

Primeira. Segundo o INE, o PIB de Galicia, logo de tres anos de contracción, subiu en 2014 un 0,5%, unha suba por baixo da media estatal que foi do 1,4% e da Unión Económica e Monetaria (0,9%).

Por ramas de actividade produtiva, o mellor comportamento en 2014 produciuse en Galicia no sector dos servizos e o peor, un ano máis, na construción.

O PIB por habitante de Galicia subiu en 2014 un 0,3%, e o estatal un 1,2%.

Galicia, que recortara en tres puntos porcentuais a diferenza co PIB por habitante medio estatal no quinquenio 2008-2013, tivo unha forte caída en 2014 (catro puntos porcentuais) e quedou coa menor porcentaxe do último sexenio.

Segunda. O valor das exportacións/expedicións de Galicia ao estranxeiro, que acadara en 2013 o récord na nosa historia (con 18.762 millóns de euros) baixou en 2014 a 17.826 millóns. O importe en 2014 das importacións/introducións do estranxeiro por Galicia foi de 14.540 millóns de euros (cunha lixeira diminución respecto de 2013). Poñendo nunha balanza os importes das vendas e o das compras ao estranxeiro, Galicia tivo en 2014 un superávit de 3.289 millóns de euros.

Terceira. O IPC baixou un 1% en Galicia e en España en 2014. En Galicia diminuíron os prezos en sete grupos de gasto, con especial intensidade no de comunicacións (-5,7%) e subiron lixeiramente en cinco grupos de gasto (só no ensino chegou ao 1%).

Cuarta. En taxa de risco de pobreza, Galicia está 6,8% puntos porcentuais por baixo da media estatal e só tres comunidades rexistraron en 2014 unha taxa máis baixa (País Vasco, Navarra e Madrid, as tres de maiores ingresos medios por habitante). Sen embargo, no último sexenio houbo unha notable suba da desigualdade.

Quinta. O peso relativo das remuneracións salariais no PIB, descendeu por terceiro ano consecutivo ata situarse no 44,5%, sendo no conxunto do estado do 45,5% e a media da UE do 49,3%.

Sexta. De acordo cos datos do Directorio Central de Empresas do INE, o número de empresas nas catro provincias galegas decreceu por sexto ano consecutivo, se ben o fai en menor medida que no conxunto estatal. As empresas galegas diminúen ao inicio de 2014 en 1.253 (un 0,65% menos con respecto ao ano anterior) e representan o 6,13 % do total estatal, a mesma porcentaxe do ano anterior, das que arredor da metade non teñen persoas asalariadas.

Sétima. Galicia rexistrou unha lixeira diminución do emprego no ano 2014, mentres que subiu un 2,5% na media estatal. A taxa de ocupación (57,4%) é semellante en Galicia e no total español (57,6%), mais están moi por baixo da taxa na Eurozona (63,5%).

Oitava. En materia de economía social, aínda que sube lixeiramente o número de cooperativas inscritas na seguridade social no ano 2014, baixa en 92 o número de persoas traballadoras das mesmas. Baixa tamen o número de sociedades laborais inscritas ao constituírense 42 sociedades no ano 2014 e causar baixa 64.

Novena. Por vez primeira desde 2010, a poboación desempregada baixou en 2014 un 6,1% en Galicia (17.100 persoas) e un 8,1% no conxunto do Estado.

A taxa de desemprego de Galicia baixou un punto en 2014 e a española dous puntos. Segue sendo menor en Galicia (21%) que na media estatal (23,8%), mais reduciuse o diferencial un punto respecto do ano anterior.

Décima. Os datos do paro rexistrado reflicten un descenso dun 7,6%. No conxunto do estado, a redución foi só do 5,7%.

A taxa de paro rexistrado acadou o 19,93% en 2014, presentando un peor comportamento no caso das mulleres, no que se chegou ao 21,75%, fronte ao 18,29% do colectivo masculino. Por idades, é o grupo de menores de 25 anos o que reflicte peor resultado cunha taxa de paro do 20,89%.

Por sectores de actividade é no sector servizos onde máis demandantes de emprego se concentran, pois supera á suma de agricultura e pesca, industria, construción e sen emprego anterior.

Décimo primeira. Galicia foi unha das tres comunidades autónomas (xunto con Asturias e Castela León), nas que baixou a poboación nos últimos catro anos. O devalar demográfico de Galicia vaise facendo mais intenso cada ano, e en 2014 multiplica por sete a diminución porcentual do ano 2011. Diminuíu tamén por terceiro ano consecutivo a poboación estranxeira inscrita no padrón municipal en Galicia que pasou de 112.183 persoas inscritas no ano 2011 a 98.245 persoas inscritas no ano 2014.

Decimo segunda. Na contratación mantense unha maior representación dos homes (53%) fronte ás mulleres (47%). Apreciase tamén un maior uso dos contratos temporais, dos contratos a tempo parcial (en 2014, por vez primeira, o eventual por circunstancias da produción a tempo parcial superou ao de xornada completa) e un menor concerto de contratos indefinidos.

Hai que destacar que seguen a existir modalidades contractuais eminentemente femininas, como a de interinidade (71%) e a de prácticas que volve superar aos contratos concertados con homes. O sector servizos e ocupacións como empregada administrativa e traballadoras de servizos de restauración, persoais e de comercio manteñen a maioría feminina.

Décimo terceira. Polas características do traballo das mulleres (máis traballo a tempo parcial, subrepresentación en postos altos, menor antigüidade media, maior temporalidade, categorías menos retribuídas altamente feminizadas, etc.) as mulleres galegas percibiron un salario medio anual inferior nun 22,6% ao dos homes. O 36% das mulleres galegas tiveron ingresos anuais iguais ou inferiores ao salario mínimo interprofesional.

O importe medio das prestacións por desemprego percibidas polas mulleres galegas foi o 80% do das prestacións recibidas polos homes. De igual xeito, as pensionistas galegas só percibiron como media o 74% do importe das pensións do colectivo masculino.

Décimo cuarta. As excedencias para o coidado de familiares foron solicitadas por mulleres nun 82% dos casos. Porcentaxes similares danse nas excedencias por coidado de fillos e fillas (94% de mulleres). Do total de persoas que realizan un traballo a tempo parcial por coidado de nenos e nenas, persoas enfermas ou incapacitadas, o 96% son mulleres.

Decimo Quinta. No ano 2014 produciuse un incremento das contratacións, acadando 786.408 contratos.

Do total de contratos rexistrados, un 92,2% o foron baixo unha modalidade de duración temporal, e só o 7,8% foron de xeito indefinido.

A modalidade contractual máis utilizada segue a ser o contrato eventual por circunstancias da produción (43% dos contratos iniciais). En segundo lugar atopase o contrato de obra ou servizo determinado (36% dos contratos iniciais).

En relación á xornada, o máis significativo foi o incremento dos contratos a tempo parcial, que acada o 36,6% no ano 2014.

A taxa de temporalidade no sector privado chegou ao 25,8% no colectivo masculino e o 25,4% no feminino. No sector público situouse no 13,3% e 23,5% para homes e mulleres, respectivamente. A rotación anual dos asalariados galegos foi de 4,16 contratos eventuais por cada traballador, mentres que nas asalariadas galegas acadou os 3,50 contratos.

Décimo sexta. Con datos da Seguridade Social, no ano 2014 incrementase globalmente a cifra de empresas inscritas, e pódese observar que é superior o número de autónomos sen persoal asalariado, que

é o grupo que máis medra neste ano. Destaca a ocupación elevada de persoas traballadoras en empresas cuxa titularidade corresponde a persoas xurídicas.

Se ben non se incrementa o número de empresas de traballo temporal, en todas as provincias galegas aumenta o número de contratos de posta a disposición efectuados por estas.

Décimo sétima. Por vez primeira desde 2009, no cómputo anual de 2014 (media anual), troca a tendencia á diminución anual do número de persoas afiliadas á Seguridade Social, tanto en Galicia como no conxunto do Estado. Na Comunidade Autónoma galega o número de persoas afiliadas increméntase en media anual no ano 2014 en 4.400 cotizantes. As 921.800 persoas afiliadas en alta, en media anual, representan o 5,57% do total do Estado.

Decimo oitava- A relación entre persoas activas e pasivas no sistema da Seguridade Social mantén en 2014 a porcentaxe do ano anterior. Increméntase o número de prestacións, pero tamén en proporción similar as persoas afiliadas, representando en Galicia 1,24 cotizantes por pensionista, fronte ao 1,80 do conxunto do Estado (onde mantense tamén a mesma porcentaxe).

Décimo novena. Increméntanse en computo anual ao fin de 2014 as afiliacións á Seguridade Social no colectivo das mulleres 3.040, que pasan a representar en decembro do citado ano o 48,61% do total das persoas afiliadas en Galicia.

Vixésima. Da formación de demanda dirixida á poboación ocupada en Galicia participaron un total de 173.381 persoas, 99 máis co exercicio do ano anterior. Advírtese neste grupo un lixeiro incremento da porcentaxe de homes participantes, que segue a ser maior que o das mulleres: do total de participantes, 101.596 (58,6%) son varóns, mentres que 71.785 (41,4%) son mulleres. A maior porcentaxe de participantes concéntrase no grupo de idade de 36 a 45 anos, en ambos sexos.

Respecto aos contidos formativos con maior número de participantes, destaca que “Prevención de riscos laborais en xeral” concentra un ano mais o maior número, 40.122 (23,10%), mentres que as dúas seguintes accións de maior número de persoas formadas son a “Xestión de Recursos Humanos” (7,40%) e “Seguridade Alimentaria” (6,80%). A continuación sitúanse as de “Idiomas” e “Informática nivel usuario” como cuarta e quinta opción mais seguidas.

Vixésimo primeira. Logo da tendencia descendente na sinistralidade laboral nos últimos anos, no 2014 en Galicia, o mesmo que en case toda España, incrementouse o total de accidentes en xornada de traballo, cun aumento do 3,79%, e un incremento nos accidentes mortais superior ao 25%. Na clasificación por actividades económicas dos accidentes, o comercio e a construción, nas súas diversas modalidades, son

con grande diferenza as actividades que, en xeral, máis sinistralidade rexistran, nas que resalta a cifra dos accidentes mortais na pesca.

Vixésimo segunda. No que se refire ao índice de incidencia, Galicia está por baixo do índice estatal no total de accidentes, tendo nove comunidades, e as cidades autónomas de Ceuta e Melilla, un maior índice de incidencia. Se nos fixamos no índice de incidencia de accidentes mortais, Galicia ocupa o segundo lugar das Comunidades, cun índice que está máis de catro puntos por riba da media estatal. Na evolución destes índices en Galicia, observase un incremento en relación cos anos anteriores.

Vixésimo terceira. O número de convenios colectivos que existen en Galicia a 31 de decembro de 2014, xa sexan vixentes ou prorrogados tacitamente, é de 896, dos cales 122 son de sector e 774 de empresa. Asináronse por primeira vez este ano 35 novos convenios (todos de empresa), dezaseis na Coruña, cinco en Lugo, un en Ourense, once en Pontevedra e dous de ámbito autonómico.

Vixésimo cuarta. O incremento salarial pactado nos convenios colectivos asinados e revisados en 2014 foi do 0,52%, o incremento mais baixo desde que hai rexistros no Consello Galego de Relacións Laborais, aínda que esta media é superior ao IPC galego e ao estatal deste ano que foron do -1,0%.

O 11,81% dos convenios asinados, e o 40% dos revisados recollen cláusulas de revisión salarial. O 72,22% dos convenios asinados este ano recollen pactos de ultraactividade. Nos convenios de sector a porcentaxe de convenios con pacto de ultraactividade é do 80% e nos de empresa do 71,32%.

En materia de xornada, a media pactada no ano 2014 foi de 1766,64 horas, sendo máis reducida nos convenios de empresa (1730,69 horas) fronte aos de sector (1775,86 horas). Son 99 convenios colectivos (o 68,75% dos asinados este ano) os que indican unha xornada inferior á máxima legal (9 de sector e 90 de empresa).

Vixésimo quinta. Rexistráronse en 2014 en Galicia 194 inaplicacións de convenio (180 en 2013 e 61 en 2012) que afectan a 2.771 persoas traballadoras, das que 1.290 son homes e 1.481 mulleres.

Respecto das condicións de traballo que se inaplican, no 95,88% refírense á contía salarial, sendo dentro destas a redución do salario a que máis se produce (72,68%).

No 78,87% das inaplicacións rexistradas, ao non existir representación legal das persoas traballadoras, a composición da comisión negociadora correspóndese co establecido no artigo 41 do Estatuto dos traballadores (comisión dun máximo de tres membros integrada por persoas traballadoras da propia empresa e elixida por estas democraticamente). O 87,11% das empresas que inaplicaron convenios colectivos en 2014 teñen menos de 31 persoas traballadoras.

Vixésimo sexta. Con datos do Ministerio de Emprego e Seguridade Social, a conflitividade laboral diminuíu sensiblemente neste ano, dato que se aprecia no descenso do número de folgas, participantes e xornadas non traballadas.

Vixésimo sétima. En expedientes de regulación de emprego, diminúen neste ano tanto o número de expedientes como o de persoas traballadoras afectadas, feito que se produce en todas as Comunidades Autónomas, tanto en despedimentos colectivos, como en suspensión de contratos e redución de xornada, o que supón en Galicia unha redución dun 43% de persoas afectadas.

Vixésimo oitava- O número de persoas perceptoras en Galicia da prestación económica de desemprego sitúase en media anual do 2014 en 134.783, cunha diminución do 13,31% con respecto ao ano anterior e supón o 5,30% do total estatal. Máis da metade das persoas perceptoras da Comunidade Autónoma (55,7%) sono dunha prestación asistencial (subsídio ou renda activa de inserción).

Vixésimo novena: As 938.543 persoas beneficiarias do conxunto de prestacións sociais en Galicia supoñen o 34,15% do total da poboación, porcentaxe que é 7,74 puntos máis elevada que o correspondente ao total do Estado. O importe mensual destas prestacións, preto de 688,2 millóns de euros en xaneiro de 2015, representan en Galicia, unha contía de 250,37 euros por persoa beneficiaria.

Trixésima. Se analizamos os resultados dos procesos electorais en Galicia durante o período de catro anos e tendo en conta os representantes con mandato en vigor a 31 de decembro de 2014 segundo a data de rexistro das actas, pódese ver que a central sindical UGT-Galicia, cun 29,99% do total, é a que obtivo maior número de representantes (5.086), seguida do SN de CC.OO. de Galicia e CIG con 28,01% e 26,81%, respectivamente (4.750 y 4.547 representantes), o resto dos sindicatos e grupos de traballadores acadan un total de 2.574 representantes (15,18%).